



*Minggu, 25 Juli 2021*  
**Ogen: Matius 21:21**



**Begiken Sora Tuhan**



**E**nterem kalak ngatakensa maka Kristen e eme agama si melala i je aturenna, i bas ndalani aturen e enggo terjeng rutinitas entah kebiasaan. Deba lit ngusih-ngusih, bage bahan kalak bage ka bahanna. Payo kin bage Kristen e? Kristen e eme hubungan entah relasinta ras Tuhan. Tiap wari lit komunikasi subuk arah megiken soraNa entah arah ngikutken persuruhanNa. Pernah lit sada unngkapen sekalak petugas departemen keuangan si meriksa dolar palsu. Nina petugas e, guna meteh dolar e palsu perlu waktu erjam-jam mperdiateken dolar asli. Alu megermet iperdiateken dolar asli e, gelah si eteh apai dolar palsu. Bage me adi er-jam-jam kita ras Tuhan, si perdiateken kataNa ras si ikutken, tentu si tandai sora Tuhan si ngerana i bas pusuhta. Ertina relasinta ras Tuhan la ersung-sung.

Renungenta wari enda ngajuk kita megiken sora Tuhan Jesus, si ngerana man banta, 'adi tek kam man Dibata dingen la monce-once ukurndu, ngasup kap kam erbahanca bagi si Kubahan nandangi batang ara enda.' Adi sioge ayat si perlebe maka isumpahi Jesus batang ara erkiteken bulungna mbur tapi la erbuah. Inti pengajaren Jesus e eme 'tek.'

Tek e la terjeng teori (pasif), si eteh kata Dibata ras ngaku kita aku tek man Dibata si nggeluh. Tapi kai pe la silakoken bukti kita tek, ertina la erbuah. Kiniteken sibage isumpahi Tuhan bagi batang ara ndai. Tek e aktif, lit hubungan si mehuli ras Tuhan, lit waktu ercakap-cakap, janah ngelakoken kai si isuruh Tuhan si idat kita arah percakapennta si teptep wari. Ercakap-cakap e arah pertoton. I bas hubungenta si mehuli ras i bas kita ngikutken sora Tuhan e, i je me kita ngaloken kuasa ras pasu-pasuNa. Emaka kai pe siipindo man baNa ibereNa nge. Tek e sada kepastin, adi mindo ugapa pe bereNa. Engkai maka pasti? Saba kita temanNa. Kerna waktu Tuhan si metehsa.